

Slide #1

大齋期第二主日. 2024-02-25 盧永信
創 17:1-7, 15-16; 詩 22:22-30 ; 羅 4:13-25
可 8:31-38 或 9:2-9

願我口中的言語，眾弟兄姊妹的心懷意念，在主面前，皆蒙悅納，阿門。

Slide #2 我們在這裡真好

馬可福音第九章第五至七節（可 9:5-7），彼得對耶穌話，「拉比，我哋喺呢度真係好」，可以搭三座棚，一座俾你，一座俾摩西，一座俾以利亞。」跟住，有聲音從雲彩話，「這是我的愛子，你們要聽從他。」

呢段經文，使我記得我十幾歲嘅時候，早晨被鬧鐘鬧醒，被竇暖屈屈，尤其係冬天。真係「我在這裡真好」，唔願起身，呢個時候，母親就會催促，「夠鐘起身返學啦，唔係遲到啦... 聽話啦，起身啦」。我就會急急起身食早餐返學。

Slide #3 大齋期：與上帝復和

今日係大齋期第二主日。教會鼓勵信徒喺大齋期間，自我反省同懺悔認罪，再一次將自己獻上，當作活祭，與上帝復和。

Slide #4 信仰歷程

馬可福音今日個段經文嘅前面同後面，即係由 8:22 至 9:32 呢一組經文，如果大家一口氣讀，就會發覺，正如一啲聖經學者指

出,馬可係寫緊一個信徒嘅信仰歷程. 先係一個盲眼嘅人, 求耶穌醫治, 由乜都睇唔到, 到漸漸矇矇矇矇, 到睇得清清楚楚, 跟住就係 彼得認信耶穌, 「你是基督」, 其實彼得在當時都係似明未明, 佢唔俾耶穌去耶路撒冷。耶穌就同門徒解釋自己嘅使命, 教導門徒, 叫佢哋要背起自己嘅十字架嚟跟從耶穌。

接續落嚟嗰段, 就係今日登山變象嘅經文. 耶穌帶咗三個入室弟子上咗個高山, 基督變化面貌, 榮光四射, 重有舊約分別代表律法傳統, 同先知傳統嘅 摩西同以利亞, 一齊顯現, 彼得有機會一嘗天國嘅榮耀, 可能陶醉喺呢個屬靈高峰, 唔願走, 但係後來都係順從主耶穌嘅帶領, 跟從耶穌走翻落山, 走翻入人群中, 繼續傳道服事嘅工作, 一路服侍, 一路學習。

Slide #5 大齋期靈修

呢一組「信仰歷程」嘅經文, 非常之豐富, 盼望大家喺今個大齋期, 考慮用呢段經文做經, 以牧師所主領嘅大齋期靈修「尋回信仰的真義」做緯, 去反省, 思想下自己屬靈生命, 自己同神嘅關係, 諗下上帝俾我哋嘅恩典, 睇下我哋應該點樣回應。

Slide #6 向著標竿直跑

返嚟睇番呢段經文, 由慕道, 信道, 到喺信仰路程上跟住屬靈老師繼續學習, 改正更新, 繼而攀上屬靈嘅高峰, 但嗰度並唔係終點, 要繼續跟住主耶穌嘅腳蹤, 好似耶穌咁, 走入人群之中, 去宣教關懷, 正如喺約翰福音第四章嗰度記載, 將活水帶俾井旁嘅女人, 將活水帶到只有井水嘅地方 (約4:1-15)。

呢段經文，一氣呵成，中間並無記載一夥兒停落嚟唔郁，留底嚟屬靈嘅高峰，喺「靜寂嘅光中」，淨係同嗰個「不動的第一因」「唧唧我我」（「靜寂嘅光中不動的第一因」係李思敬牧師翻譯希臘哲學家對佢嘅神嘅認識嘅用詞）；段經文更加無話講完「我們在這裡真好」就收工，唔再向前行。

我哋肉身嘅生命，自出娘胎，就不停咁向前，向著成長進發，我哋嘅身體，唔停咁新陳代謝，如果唔係，就會萎縮，靈命亦都係一樣，不進則退。唔郁，躺平，唔單止影響自己嘅生命，更加連耶穌基督俾我哋嘅使命都放棄，對天國早日降臨，又少咗一個精兵。

莫克森（Philip Moxom）係十九世紀美國著名文學家、詩人同神職人員，喺佢嘅著作《奮勇向前》（The Aim of Life），指出人同動物一個重要嘅區別特徵就係，人可以為咗一個目標而活，呢個目標可以消除生命中固有嘅混亂同散漫，使之變得清晰明確並充滿力量，佢勉勵讀者，特別係啲年青人要確立方向、鎖定目標，朝美好未來勇往直前。

使徒保羅喺腓立比書 3:5-15 咁寫，「...弟兄們，我不是以為自己已經得著了；我只有一件事，就是忘記背後，努力面前，向著標竿直跑，要得上帝在基督耶穌裏從上面召我來得的獎賞。」大家記住，呢度嘅忘記背後，是叫我哋忘記以前因為驕傲自滿而以為乜都掂晒，好似保羅咁以為虔守律法就得到拯救，上咗岸，得咗獎賞。讀聖經千祈唔好「斷章取義。」

Slide #7 過去，現在，與將來

所以向著標竿直跑，並不等同忘記以前嘅一切，唔係與歷史一刀割，更唔係叫自己唔去珍惜當下。我哋要從過去，從現在，去預備將來，去準備我哋要行嘅路，去幫我哋作出合乎上帝心意嘅選擇。

我哋要**回望過去**，因為我哋要植根於過去嘅經驗；我哋**珍惜當下**，一來就好似《傳道書》所講，要「享受在日光之下勞苦得來的成果」傳 5：18，但同樣重要嘅係，要從現在所擁有嘅事物，心態，去蕪存菁，從而去**面向將來**，為嘅係對準標竿直跑。

Slide #8 植根過去

先講**植根過去**。「植根過去」唔係叫我哋俾過去嘅舒適，防礙我地向前行，好似以色列人出埃及，喺曠野一路行一路埋怨，話無好似喺埃及做奴隸個時咁，唔駛錢有魚，有多種瓜菜食，咁樣磋跼時日，結果喺曠野兜兜轉轉 40 年。

「植根過去」唔係叫我哋「攞住石頭當水泡」，好似使徒保羅最初以為靠自己虔守律法就可以得救。

「植根過去」更加唔係叫我哋俾以前做錯事嘅罪疚感纏綁住，唔能夠向前行，要提醒自已，耶穌基督已經喺二千幾年前喺十架代替我哋受咗刑罰，耶穌基督以佢無罪之身，替換咗我哋有罪之身，我哋因為呢個奇妙嘅交換，已經被稱為無罪，可以活得輕省，大步向前行。

「植根過去」，係叫我哋從過去累積嘅屬靈經歷，去明白神嘅旨意，去選擇前面嘅道路，個人如是，群體如是。回望過去頌主堂卅幾年嘅歷史，我體會到上帝係教會唔同嘅階段，差遣唔同嘅牧

者，向我哋示範乜嘢係上帝嘅旨意，教導我哋成長。當中有任勞任怨嘅開荒者；有關懷備至既安慰者；有面向標竿，勇往直前，促進復和，重建聖殿既奠基者；有強調靈程，使靈命成長的催生者；亦有幾年頻密轉變嘅領導，使我哋學習各家各法嘅長處。唔止係咁，卅年嚟，背後仲有天父，透過聖公會多倫多教區不離不棄，信實不變嘅愛戴同支持，仲有聖公會大家庭，尤其係本堂嘅教友，同其他三間華人聖公會嘅同行；加上教會年青一代嘅接棒，頌主堂真係一間蒙福嘅教會。

Slide #9 前多倫多大主教約翰遜在頌主堂 20 週年紀念特刊中賀詞

多倫多前任大主教莊臣 Archbishop Collin Johnson， 喺我地廿周年堂慶特刊咁寫，佢話頌主堂係廿幾年嚟 所經歷到嘅，比起其他教會 幾代所經歷到嘅 重要多；眨吓眼又過咗差唔十多年，但我相信莊臣大主教嘅觀察，仍然係咁真實，我哋有豐厚嘅歷史，幫助我哋去 體驗神嘅旨意為何。

Slide #10 珍惜當下

珍惜當下，唔係「卷戀現在唔願改」，唔係沉迷舒適嘅生活，或者紙醉燈迷嘅享受，唔願離開，更加唔係好似舊約王國時期嘅以色列人，一邊崇拜，一邊遠離上帝拜偶像，又欺壓弱勢社群，生活係罪惡嘅網羅當中，先知屢勸不改， 結果帶嚟亡國被擄嘅慘痛後果。

珍惜現在，係要將硬件軟件都預備妥當，**去蕪存菁**，加入新嘅合適嘅思維元素，為嘅係更有能力實踐主吩咐嘅使命，我相信耶穌講嘅，「我來不是要廢掉律法和先知，不是廢掉，乃是要成全」^{太5:}

¹⁷，可能就係呢個意思，耶穌基督無拘泥於傳統嘅律法主義，而係將律法既精神，精粹，喺生命中活出嚟，並且發揚光大。

珍惜現在，因為現在就要選擇我哋應走嘅道路，係上帝喜悅嘅道路？抑或自己嘅道路？為咗選擇上帝所喜悅嘅道路，當然要明白佢嘅旨意。舊約時代有律法指引，有先知提醒，新約耶穌時代就直接了當，有耶穌親自講解，親身示範；我哋而家呢班基督徒，就當然係倚賴我哋嘅《聖經》。

Slide #11 回歸聖經

中世紀改教運動，馬丁路德呼籲教會回歸聖經，而家嘅社會處於後現代時代 (post modernism)，強調個人：同個人嘅見解，個人嘅感受，因為咁，就更加要回歸聖經，我哋而家讀聖經，好多時都將重點放喺「呢段聖經 我 點理解，我 有乜嘢感受」。呢個當然係非常重要，但係就唔好忽略咗「上帝 喺 呢段聖經想講乜嘢，上帝 想同我講乜嘢。」千祈唔好本末倒置

Slide #12 面向將來

面向將來，「將來」，如果係一個未知之數，會使我哋好迷惘，無所適從；「將來」，如果淨係知道 個標竿喺邊度，但係無聖靈嘅帶領，無預備好硬件軟件，我哋會覺得好無能為力，無可奈何，枉費咗上帝畀我哋嘅恩賜，但係既然我哋已經植根喺我哋過去豐盛嘅經歷，我哋又珍惜我哋當下，我哋就可以一無所懼咁面向將來，向著標竿直跑。^{腓 3:13}

頌主堂嘅將來，上帝一早已經有佢嘅計劃，過去嘅歷史，就係一個好好嘅印證。上帝喺過去每一次差派一個新主任牧師或者傳道嚟，就為頌主堂揭開嶄新嘅一頁，首先派個牧者嚟創堂，火燒教堂之後，派個牧者教我哋預備自己，再次出發；跟住就差遣一個牧者帶領我哋走過曠野，進入應許地，重建聖殿，發展聖工，跟住又派一個幫我哋反省我哋嘅靈命；然後差咗幾位唔同嘅牧者幫我哋學習多元世界嘅挑戰。到咗新冠疫情啱啱靜落嚟，上帝就差遣新嘅主任牧者，催促我哋重新上路。上主無時無刻，不離不棄，嘅帶領，就係頌主堂將來嘅最佳保證，但係對啲種子嚟講，土壤雖好，仍然需要農夫適心灌溉施肥。

Slide #13 彼此相愛, 合而為一

正如李時雄法政牧師，喺梁牧師就職典禮講到，梁牧師有一顆火熱嘅心，好多教友都有目共睹，而頌主堂素來有一班忠心嘅信徒。讓我哋一齊誠懇禱告天父，叫頌主堂上下彼此相愛，在主裏合而為一，共負主軛，為著基督耶穌吩咐我哋嘅大使命，宣揚福音，關顧社群，向著標竿直跑，榮神益人。阿門。

(3286 words) (18 min)